

JESUIT CENTRE FOR THEOLOGICAL REFLECTION
“Promoting Faith and Justice”
P.O. Box 37774
10101 Lusaka, Zambia

Tel: 260-1-290410
E-mail: jctr@jesuits.org.zm

fax: 260-1-290759
web: www.jctr.org.zm

01 February 2006.

Tunamimeneka yetu vaka JCTR!

Kuwunda camwata wetu Yesu Kulishitu.

Yetu tunawahilila kumitumina vinangwilo vyakumikafwaka kunangula muLent yauno mwaka wa 2006. Tulinakatalililo nalufwelelo ngwetu vinangwilo vyaLiuka evi vinakutala hakuyoya cavathu navimikafwako mukunangula cenu hayino ngonde yaLent. Tunafwelela ngwetu echi kukafwa navacikolesa nawuhashi nakushishika cavatwamina vaLiuka vakungalila yenu.

Kwesekesa naunjiho tunatambula myaka eyi yinahici kunyima, twatachikiza ngwetu vinangwilwevi vyachikumikafwa mukunangula cenu mwechi kuvizacisanga nawa kechi kaha hakunangula muLiuka oloze namuma uka enu amandende, mumazavu avakweze nahalwola lwakulomba yenu vavene uka.

Mutwe wachihande waulemu uli muli evi vinangwilo yayino ngonde yaLent tunakumulomba yenu vakakwitava muzate china kusakula echi chinakwiza ngana chakusakula twamina walifuchi, vakakutwimanyinako muzuvo yajishimbi nama councillors. Tulinalufwelelo ngwetu hakusakula kana echi kakwechi kupwa kulyapulako. Chinahase kupwa ngoco kuvanga kaha yetu vathu natulihakaho nakuputuka kusandasanda ava vanakutonda kwimana nakuhasa kuvwota omu lize likumbi nalikahete. Shimbu tunakulingango katwatela kulihenda kukusambilila zangi yayinene yaKalunga eyi asolwele hakuyanda, kufwa nakusanguka caYesu Kulishitu nduma.

Tunakuhana kusakwilila kuli Kapilishitu Fr.Smart Chinyama, S.S., waha Emmaus Spirituality Centre, ou alongesanga evi vinangwilo.

Yetu tuvosenana kuno kuJCTR ngwetu kisu kaha nawa mupwenga vathu vakulihana kukulomba hangone yaLent. Natukawahilila kwivwa mazu akufuma kuli yenu omu evi vinangwilo vinamikafweko. Kukumbulula cenu nachitukafwako hakulongesa vinangwilo vikwavo!

Tunasakwila!

Simson Mwale
Bboloka Bubala Nchimunya, S.J.

Kutanga chatete: Kuputuka 9: 8-1
Kutanga chamucivali: 1 Petulu 3: 18-22
Mazu a Mujimbu wamwaza: Mako 1: 12-15

LWOLA LUNAHETE

Shinganyekenu Lungu anakuya kucipatela mwomwo ali nacishikashika. Anakuyayavala ngwenyi maundu apwanga nakunwa akuhonesa kukola kawamukafwileko kukumisa ukalu wenyi. Ndotolo jino himwamulweza lwola lunahete lwakumumpima mangana vamone nge ali natu ,tutu vamusongo wachishikashika. Jino himwakana, mwomwo kuli yikiye manyinga akujila kawatela kuwazachisa kuvyakumpimampimako. Ou Lungu naumushinganyekela ngwove ika? Chikupu ahonene kuzachisa lwola lwakwoloka lwakumukafwa!

Lelo hicalumingo catete caLent, ngonde yamakumbi makumi awana. Elu hilwola twatela kulihenda kuvyuma vimwe vize twazanga nakulihana mukulomba nakuhana vaze vana hono. Evi vyosena twatela kuvilinga mangana yipwenga yila yakutwalumuna yamucano. Yesu muMujimbu waMwaza wa lelo anakuhanjika kuli yove na yami ngwenyi, "Lwola lunahete!" Hashimbu yakuyoya cetu, lwola tulinalwo lwakwalumuka nakwitavila Mujimbu waMwaza. Oloze, Lent hilwola lwakulimanyina elu Liuka lyosena lyeci kulinunganga hamwe muvikiikita nakulomba mangana twalumuke camucano.

Hakuputuka yino ngonde yakukisula yaLent, Yesu anakutulomba tutambukenenyi hamwe mupambo. Echi kutusanyika kana cinahase kutunehela woma! Yenu vamwe munapu ku Western Province mwatacikiza ngwenu mupambo, mutu echikupwanga vene ngana cakuhona vyakumukafwako kukuyoyo chenye caMujimba. Camucano mupambo mweci kunehanga kuteta nakuhona, kutonda wakutukafwako nakulikehesa. Mwomwo ika jino mutu hano hamavu mwatonda kumakila kuyoya camupampo? Ikaze kulilingisa kupwa wakuhona, kwimanyina kuyoyela hali mukwenu nakulikehesa?

Yesu nakumbulula echichihula mumazu amujimbu Wamwaza walelo: "Lwola lunahete naWanangana waKalunga uli nayenu. Alumukenu nakwitavila Mujimbu waMwaza." Kuli vaze vakakusekasana, ngana vakakulanjisa hacisakano, navakulweza ngwavo kukokela kumukombe wove cacilemu, chipwe ngwavo mukakoma alisakoma yenye. Vatu vamwe, vali namali amavulu oloze vanakuhono kutwala kusekasana cavo kulutwe mwomwo yakuhona kutacikiza kanawa mwakusekasanyina. Camucanovene, Lwola lunahete, unonyi lwola lwaka? Yesu natulweze, "Wanangana waKalunga uli hakamwihi nayenu. Alumukenu nakwitavila Mujimbu wamwaza."

Cakavanga, Lent hilwola lwakulizanga kuwahilila Zangi yayinene yaKalunga eyi asolwele hakuyanda, kufwa nakusanguka caYesu Kulishitu. Kaha natulizanga ngacilihi hacilikeci cacilemu ngana? "Alumukenu nakwitavila mujimbu wa mwaza" Yesu anakulweza tuvoseni. Vanatulombo tuvoseni twalumune jijila jetu nakwitavila Mujimbu Wamwaza Ou waYesu.VaLuvale ngwavo "zombo mungowa keci lizu lyaMutuko." Shikaho cacilemu kwivwilila nge navakuhuhumuna. Shikaho lwola lunahete lwakulipezalisa usendo wetu navakwetu nakulihakilako kutwala kulutwe ciyulo, kuunda, zangi nakulilemesa.

Kuli yetu vakaZambia, lwola lunahete, cekanawa, lwakusakula vatwamina. Mwomwo unOmwaka wa 2006, himwaka natupwa nakusakula twamina walifuci, vakutwimanyinako muzuvo yajishimbi na macouncillors. Cino calumongo catete caLent cinatelamo, Yesu anakwanukisa yove nayami ngwenyi uno mwaka navyoserna navisolokamo hiwana wakufuma kuli Kalunga kaha kawatela kulyenyeka kahako. Kaha nawa twatacikiza ngwetu hakusoloka calwolwelu navyeseko nawa vyeci kuvulanga.

Evyi vyeseko vinahase kuhungula kulema cauno mwaka nakunehesa echi kuwaha calwolelu lweci kwizanga kuli yetu halwola lwakusakula muno muZambia.

Lwola lunahete lwakusakula vatwamina ava vatela kutwimanyinako mulifuchi mukulihana nakushishika. Oloze kutwaminyina kana eci natuhasa kucisakula kuvanga yetu vosena twalisonekesa kusakula natulinga chuma cimwe cacilemu cakukambilila lipepa mutu uze tunazange halikumbilize lyakusakula. Utwamina wakulihana kuzacila watu nakushishika natuhasa kuwaha kuvanga yetu watu tupwenga vakushishika nakulihana najingolo jetu. Echi chili ngana mwomwo, hakukinduluka kunyima natuwana mu 1978, Tufunga vaLiuka lyaKatolika mukuhanjika cavo hakamwihi nakusakula cauze mwaka vahanjikile hatoma ngwavo: "Tunakumulomba yenu watu jetu kuzacisa kanawa lusesa lwenu lwakusakula nakucimbata kupwa mulimo wenu waKwitava kulinga ngoco!

Hamwenahamwe yetu vakakwitava tweci kuhanjikanga ngwetu vaze vali nakututwaminyina kaveci nakuzata kanawako, mwomwo tweci kufwelela eci cinalitoto nakusanyika cetu caupolofweto. Oloze, hakuheta halwola lwakusakula vatwamina ava tuna kutonda, kuyako nduma, tunajimbalako lyehi ngwetu ou mulimo wetu yetu vakakwitava. Tweci kulinganga ngana lunga ou twahanjikangaho lyehi ou ayyayavaklilele kukola musongo wacishishika oloze akanyine kuhana manyinga enyi kuwatwala

Kumakina vamone nge ali natutu vacishikashika! Kacatelema kaha kuka vinjikizo cakuhona kumona shina yamusongo. Tusakulenu watu navatwaminyina Lifuchi kuya kulutwe nakutona, chiyulo nakuunda ca phwevo hiphwevo, lunga navana. Chili kulombela cetu ngwetu elu lwola namuluzacisa kanawa, kwanuka nawa ngwenu, "Lwola lunahete!"

Vihula vyakushinganyekaho nakulipangila mumauka amandende

- Vyuma muka nangulihana kukilikita nakulinga lwola lwa Lent- vyakufwana ngana, kulitwamina kuhona kulya vyuma vize mwazanga, kulomba, nakukafwako kuhana vanahono?
- Nguli napwipwi yakaya nakapwako halikumbi lyakusakula vatwanyna, mwomwo na mwomwo ika?
- Vyuma muka vize ngwatela kumona chipwe kutonda kuli vaze vana kutonda kupwa vatwamina hakusakula eci cinakwiza ngana?

Vyakuhema

Kupwenga lunga anakuya kucipatela nasepalyenyi chipwe naphwevo lyenyi. Kucipatela, mwayayavala chishikashika, mutwe, kuzehya camujimba nacisheta na kukola mumambuli. Vakakuzata kucipatela navamolomba kumupima mangana vawanetututu vacishikashika kumakina. Oloze mwakana nakulovoka mucipatela.

Vilombela vyavakakwitava

- Mwangana, tukafweko tumone kukalikiza cavandumbwetu. Tunakulembelela utwivwilile.
- Mwangana, natulomba Mwono wajila atukafweko kulihana kutwala kulutwe chiyulo, kuwunda, zangi, nakulilemesa mujindanda jetu. Tunalembelela utwivwilile.
- Mwangana, natulomba hakuputuka cayino ngonde yaLent, ngwetu tuhase kwitavila kutusanyika chove kwalumuka mangana tuhase kulinga vilinga vyaMujimbu wamwaza. Tunalembelela utwivwilile.

CHALUMINGO CHAMUCHIVALI CHALUYANDO LWA YESU KRISHITU – YEAR B 12 MARCH 2006

Kutanga chatete: **Kuputuka 22: 1-2, 9-13, 15-18**
Kutanga chamuchivali: **Vakaloma 8: 31-34**
Muzhimbu wa Mwaza: **Mako 9: 2-10**

CHINAPU CHUMA CHAMWAZA ETU KUPWA HANO

Tumbanzhi ba Yesu vali mumuzhimbu wa mwaza , Petulu, Yowano na Yakova vevwile kuwaha chikupu hakumona upahu wa Yesu omu a lumukile kumeso avo. Petulu hakwimanyinako vakwavo ahanjikile nakwamba ngwenyi: “Chinapu chuma chamwaza etu kupwa hano, nakutunga ho matente atatu.” Muzhila yikwavo Petulu anakwamba ngwenyi achize kuwaha kana chakwalumuka cha Yesu Kristu haze hapili chatela kutwalekaho lika. Inyi etu? Vangahi muliyetu vanahase kuhanjika ngwavo achize kuwaha vevwile hawulo wavo chipwe hakutambula sakalamenta ya wupilishitu chipwe wusisita chitwalekeho lika? Chamwenemwene, vyuma vyamwaza vyapihila kukuma washi!

Yesu Kristu ikhiye natachikiza na chinyingi ngwenyi ou upahu wakwalumuka chenye nawukawaha chikuma chikupu kuvanga ngwe mwatambuka chamwenemwene muzhila yize yina fumu hapili nakuya kukavali. Chipwe vene omu apwile nakwivwa kuwaha hapili yize, Mwatha Yesu kavulyamineko milimo yenye yahano hamavuko – wulwilo wavatu vosena. Echi chinyingi kana chikiko chamulingishile yikhiye kutwalekaho na mulimo wenye. Muzhila yoyimwe kaha Apalahama owu tunevu mumukanda watete vechi kumusanyika ngwavo setu mulufwelelo momu ikhiye ahashile kupwa nalufwelelo kufumakuze kwimbo lyenyi nakuya nakuzachila Kalunga. Anukenu ngwenu Apalahama na pwuwenyi Sara vapwile tushinakazhi chikupu omu vapwile namwanavo Isaka. Chamwenemwene lushiko lwa Kalunga kuli Apalahama lwa kupwa navana vavavulu nalutamo. Echi chapwile chuma chamwaza kuli ava valunga na pwevo. Vakikho vatelele kuhanjika ngwavo: “Chinapu chamwaza etu kupwa hano”.

Zhinonyi Kalunga ezhile cheka nakumuluwisa Apalahama kufuma muchihela chenye chambwende; Apalahama na ikhiye momu etavile kulinga mwaya lizu lya Kalunga lelo lino ikhiye napu setu mulufwelelo lwetu. Kuyoya chetu cha shipilitu chinapu ngwe kutambuka zhila yayisuku. Vakakwitava vosena vali hawungezhi wakusaka kwizhiva omu vatela kupwa na vyuma vatela kulinga kuhichila ku malombelelo a Mwono Wazhila. Ano makumbi aluyando lwa Yesu akhiko makumbi vana tusanyika mangana tutambukile hamwe na Yesu kufuma muvihela vyetu nakulipwisa vakakukalikiza.

Ano mazu amalemu chikupu kuli etu vakalifuchi lya Zambia awuno mwaka wa kusakula vatetekeli zhetu. Hakukuma cheyi myaka yitanu vatetekeli zhetu vamwe vanahase kulivwilila chikupu nakulisamba ngwavo: “Echi chuma chamwaza kupwa hano”. Mukhiko vene vamwe vatetekeli momu vanezhilila kutwama kanawa kavechi kuhasa kushinganyeka ngwavo vanapu ngwe mutu wosena wa mulifuchi, chikuma vene omu kusakula nachikakuma. Echi kushinganyeka kana chinahase kuneha woma kuli batwamina zhetu nakuvalingisa kupwa navishinganyeka vyavipi mangana vahase kutwana havitwamo cheka. Chamwenemwene, vatu vamwokokomwoko vechi kulinga vyuma vyamwokokomwoko.

Kumana vatwamina zhetu, mwomo ya zangi ya lifuchi lya Zambia, kavechi kuhasa kukavangiza zhila ya tata Apalahamako, ou setu mulufwelelo hakulinga valihane nakuvulyamako kuwaha chavo valikehese halwola lwakusakula awuno mwaka? Inyi etu tuvoseni twatwama mumauka akulisezaseza? Kuli etu vamwe, kupwa mukaliuka kakandende chinapu chachilemu kuhambakana kupwa mulifuchi lya Zambia! Mumiyachi yavakwetu mutwama chishimo ngwavo, “Lamako shingo, wusanga kawakaluwakoko”. Mazu awa anevukana. Ngwe etu vanatulweze kusakulaho shingo

chipwe wusanga, etu twatela kusakula shingo mwomwo wusanga tunahase kuwuwana lwolo luli lwosena. Ngwe ngwavo tusakule hali liuka lyalindende chipwe Zambia, etu twatela kusakulaho Zambia. Ngwe ngwavo tusakule mutu wumwe chipwe lifuchi lya Zambia etu twatela kusakula Zambia!

Twayenu tulombenu awuno mwaka omu natusakula mangana tuzhimbalise wusanga wetu nakusakulaho shingo eyi yinapu lifuchi lyetu lya Zambia. Tulombenu mangana Mwonon Wazhila atuhane matwitwi akwivwilila kulizu lya Yesu Krishitu owu anakutusanyika mangana tusuluke kuvihela vyetu nakutambuka nenyi kuya kukavali mangana tukawahilile hakusanguka chenyi. Kulombela chetu chipwenga ngwetu: "Eyo, chamwaza etu kupwa hano, zhinonyi ove Mwatha, tuhane lufwelelo mangana tutwalekeho lika!"

Vyakushinganyekaho muma uka amandende

- Ami tetekeli, muliuka, mungalila, chipwe muboma, nguli nakulihana mangana vakwetu nawa vatwaminyineko?
- Vyuma muka vyapwa vyavilemu muchiyoyelo chami? Inyi ngwe vanangulingi ngwavo ngusakuleho hali tanga yami chipwe havyuma vyami, nangu sakulaho ika? Inyi hali liuka lyalindende (pati) chipwe halifuchi nangusakulaho chuma muka?
- Ami ngwalimonaho lyehi halutwe lwachiyoyelo chami chamwaza tahinyi ngwechi kuli mona kaha muvyuma vyami vyamwaza?

Kuhema

Kupwenga zhitanga zhivali. Eyi tanga yimwe yitwamenga kanawa, yipwenga navyakulya vyavivulu navitumbo vyakuhonesa misongo mumizhimba. Vana vavo vapwenga nakuya kumashikola. Eyi tanga yikwavo yipwenga yakuhona, vyakulya vyavindende, meya ambwende auchi, vitumbo vyauchi, vana vavo vahone kuya kumashikola. Mwana wumwe wakemba kufuma kutanga yatete ayenga nakuhema kutanga yavakakuyanda, alweze visemi zhenyi luyando lwavakwavo. Visemi vamuliwule.

Vilombelelo vyavakakwitava

- Mwangana, tuhaneko zhingolo zhakutala hamilimo yetu mukukafwa wulwilo wakaye ketu. Mwangana tunakulombo....
- Mwangana, kwalumuka chove chanehele kuwaha kuli tumbanzhi vove, tulingise tupwenga vatu vakakuneha kuwaha mungalila yetu. Mwangana tunakulombo....
- Mwangana, omu tuli nakutambuka nayove kukavali, tulingise tutave kusanyika chove mangana tuwahilile hakusanguka chove. Mwangana tunakulombo...

Kutanga chatete: Exodus 20: 1-17
Kutanga camucivali: 1 Kolinde 1: 22-25
Mujimbu waMwaza: Yowano 2: 13-25

PWIPWI YAZUVO YOVE NAYINGULYA AMI

Kuli valsalele, Tembele yapwile yakujila. Kayapwilekaha zuvo yakulombelamo nakuhana Vilumbiloko, oloze nawa yapwile cinjikizo caKalunga mukacikavo. Kuli kala kalsalele, Tembele, yalumbunwine Kalunga ali navo hamwe. Eyi zuvo yapwile cinjikizo cakuvalweza hatoma kalunga kavaseleko, chipwe tuhu vapwile vakuhehele nakuluwisa nawa mukuyoya cavo. Tembele shikaho yapwile yayilemu mukulombela cavalsalele. Echi chikiko canahesele Yesu kupihilila hakuwana watu vanakuzacisa Tembele Kupwa Zuvo yakusekasanyinamo shimbuniyatelelele kupwa Zuvo yakulemeselelamo Kalunga.

Nge omu natuvwa Mumujimbu waMwaza waLelo, vilinga vyaYesu vyakutomesa Tembele hakuhangamo vapwile nakulanjishilamo nakulanda himulimo waupolofeto. Chamukolele Yesu hakumona Zuvo yakalunga vanakuzacilamo mulimo weka. Avacipwe tuhu atacikijile ngwenyi hanyima yacho nachimunehela kole. Echi cavanehelele kupihilila nakutonda jijila jakumujihilamo. Unonyi chumamuka chahanyine yesu ou mucima wakuhona kupwa nawoma?

“Pwipwi yaZuvo yove nayingulya ami” awa akiko mazu akufuma kuTestamende yamwaka akwacile tumbaji hanyima yakumona vilinga vyaYesu. Echi hicinjikizo chaMutu apwile nalipwila lyamucano, chiyulo, navikilikita vyakutamo chikupu alihanyine nakuvamba vakulwane vaTembele halwola lwenyi oloze emanyinyine hakutwala vilinga vyakutamo kulutwe. Alihanyine cikupu kufwila havilinga vyamwaza. Mwana mwalilila poko yambeli muhane omu mwalituvayo mwecha. Kupwa mukakwitava cinapu kwitavila vyosena vize navikuwana chipwe vene kufwa. Martin Luther King, Junior, Ngwenyi, “Ou kanda achiwane lyehi echi atela kufwilaho, kanda achiputuke kuyoya” Yove nayami tunawane lye echitwatela kufwilaho?

Uno himwaka wakusakula vatwamina Muno mulifuchi lyetu lyaZambia hakulinga ngoco,vyuma vyavivula navisoloka. Chinjikizo chimwe shina vosena vanakutonda kwimana kufuma kumauka akulisezaseza naveza kuli etu namazu amwaza akutufwelelesa vyuma vyavivulu evi vana kutonda kutulingila. Echi camwaza, cacilemu nawa mwomwo natupwa nalwola lwakwivwilila evi vatwamina jetu navatonda kutulingila nge tunavasakula. Olozenyi, kutala kunyima, vamwe vavo vana kutonda kwimana navakemanyina kaha hakupihisa majina avakwavo nakwicila vakwavo malova halwola lwakuhitamo kuvatu. Hatoma echi hichuma cakuzacisa chamwaza, olozenyi kunganyo yenu-mangana ahite cakuhona kutelamo.

Yesu lelo anakutonda maphwevo na malunga vakulilemesa vavene ava nawa navalihana kuzacila vakwavo vathu, cakuhona woma, vaze navahasa kwimana nakwamba ngwavo eci chinapihi, chipwe tuhu hanyima yakuhanyika ngocho nakwiza ukalu. Evi vyumevi nge vikiko natutonda muli vaze vana kutonda kwimana nachitukafwako. Chikupu, echi nacipwa nge katalillilo kakuhona kusakula vatwamina vaze vawana kuwaha kuzachisa mazu akutukana nakutomba vakwavo. Muli eyi jila natuhasa kuwahisa tembele yetu yajijila jakusakwilamo watu naveza kuli yetu nakutonda kuvasakula. Kaha nawa twanukenu mazu amangana vahanjikile tufunga vaLiuka lyaKatolika kwakamwihini nakusakula camu 1996: “Yetu tunakumulomba yenu vakakwitava vosena mumone ngwenu chikupucikupu mauka amilingu na chiyulo ali nakuhanjika vihande navipandama hakuyoya cavathu, vyakufwana ngana kukafwa vakakuhutwa, unjimi, jijila jakutwalilamo luheto lwalifuchi kuya kulutwe, ha lwola naveza nakulilanjisa kuvathu. Vaze navahanjika vihande vyeka vyakulihandununa kuli evi-hivathu vanakutonda kaha kutukana vakwavo vanakulipika navo- kamwatela kuvasakulakoko.”

Cekanawa, ngalila yikwavo nayitela kuwahisa uno mwaka wakusakula china Zuvo yajishimbi. Tunatacikiza kulema cawowu mutango kana walivoko lyafulumende hakutwala chiyulo calikungumbuwa kulutwe na chiyulo camwaza. Lwola lwakusakula hilwola lwakukomba muzuvo, nge cinatemo! Shikaho tunahase kulihula yetu vavene vihula ngana evi: Vatwamina jetu twasakwile vanazate ngacilihi eji myaka yitanu yinahichi kunyima? Vanatwiminyinangako vishengenyeka vyavathu vaze vavasakwile tahi nyi ciku? Vanatutambukilanga tahi? Evyi vihulevi vyatela kutukafwako hakusakula vanakutonda kutwimanyinako. Lwola lwakusakula vakakutwimanyinako hilwolwa cikupu lwakwanukisa vosena navatonada kuzacila vathu nge vatela kwanuka vyosena vize navalinga natukavahulisavyo halwolelu vali havihela yetu vakakuvasakula chipwe mutu apwenga twamina wa lifuchi, nyi wakwimanyinako vathu jenyi muzuvo yajishimbu nyi hacouncillor.

Lwola lwakuvandamina kufwa nakusanguka camulwilo wetu Yesu Kulishitu lunakuswenya nawa - hivyalumingo viwana vinasaleko. Tutwaliilenuho kulomba ngwetu ngonde yino yakukisula yaLent yipwenga yalikoji yakulifumisa majilo yetu vavene hamwe nalifuchi. Tuna kulomba ngwetu pwipwi yize yatetekelele Yesu kukulusu yihase nawa kupwa mumericima yetu nakutukafwako kumona ngwetu kuli chiyulo nakuhona kulyapula nawa hakusakula cauno mwaka chakuhona kutala hafweto yakulinga ngoco. Shikaho awa mazu apwenga etu: "Pwipwi yazuvo yove nayingulya ami!"

Vihula vyakushinganyekaho nakulipangila mumauka etu amandende

- Chuma muka ngunahase kulihana kufwilaho kwesekesa mwomwo ngumukakwitava?
- Ava vosena vanatwaminyina lifuci eyi myaka yitanu yinahicimo vanazate ngacilihi?
- Nguli nalivezu cakulemesa tempele navyosena vyakujila tahi?

Vyakuhema

Pwenu navathu vavali vanakutonda vihela vyawutwamina. Ou umwe halwola lwenyi lwakulilanjisa kuvathu mwazachisa lijikakanwa, kutukana nakwimanyinakaha hakupihisa lijina lyamukwavo cakuhona kuhanjikaho havyuma vize vinapandama kuvathu nahakuyoya chavo. Ou wamucivali hakuli lanjisa cenyi kuvathu himwahanjika havihande vize vyakutwala kuyoya cavathu kulutwe navize vinapandama nawa hakuyoya cavo.

Vilombelo vyavakakwitava

- Mwangana, tunakulomba utuhane Shipilitu yakutonda chiyulo nakuhona kulyapula hakusakula cethu uno mwaka chakuhona kutala hanganyo. Mwangana tunakulombo utwivwilile!
- Mwangana, tunakulombelako yetuvavene ngwetu tuhasekumona vize twatela kwecha mangana tupwenga vatoma kuputuka namuthu himuthu swi nalifuchi. Mwangana tunakulombo utwivwilile!
- Mwangana, tunakulombelako vatwamina jetu vahase kuzachisa kanawa lwola chikumanyi lwolwa lwakuhitamo nakulilanjisa kuvathu, vahanjike vihande vize vinakuyanajisa vathu mujindanda. Mwangana tunakulombo utwivwilile!

CALUMINGO CAMUCIWANA CAKWANUKA MAKAVA AMWENE MWATA WETU YESU KILISHITU. (LENT YEAR B) 26 MARCH 2006

Kutanga Catete: 2 Mijimbu 36:14-16. 19-23
Kutanga Camucivali: Wavaka Efvesu 2:4-10
Mujimbu wamwaza: Yowano 3:14-21

KUMUNYIKA KUNEZA MUKAYE

Tuvosena ngwafwelela twatacikiza kulema cakumunyika muciyoyelo cavantu. Nge kumunyika cauci, katweci kuhasa kumona kuwaha catwama nayetuko. Cekanawa nge natutalamo swii, kumunyika ceci kutukafwangako kumona na kuhandununa vyavyipi nevi vyamwaza. Mujilakanaeyi ngwetuli mwakumunyika tweci kumonanga nakushinganyeka mwakutamo. Mumujimbu wamwaza walelo, tunevu omu Yesu Kulishitu mukushimutwila na Nikodemas nakulifwanyisa nakumunyika cineza mukaye. Tunahase nawa kumufwanyisa Kulishitu naLimbo lize vanatungila helu lyapili. Nge omu vamba vakwetu vaNyanja mucisimo cavo ngwavo, "*Muzi ukakhala papiri subisikha*" kulumbununa ngwavo, Limbo vanatungila hapili kalyeci kuhasa kuliswekako. Oloze cinapu cakeke cikuma, mwomwo Yesu Kulishitu nakutulweza ngwenyi, vantu vavavulu kavazanga mwakumunyikako kuvangila mumilima. Ngekumunyika catwama cacilemu muciyoyelo cetu, mwomwo yikaze vathuvamwe vazanga milima?

Mutanga yimwe, cisemi walunga asanyikile mwanenyi walunga wamyaka yakusemuka likumi nayivali mangana vashimutwile. mutwe wachande wapwile Kulikafwa milimo hazuvo. Yise aputukile chande namazu akwamba ngwenyi, "mwanami nge nautala hamilimo yilimuno muzuvo, watela kutacikiza ngove noko na vayaya jove vavali vmapwevo tunavecelela kuzata milimo yayivulu cikuma." Cakuhona kwenyekalola uze mwana amukumbulwile yise ngwenyi, "Tata ngunasakwililako hakunguhulisa, oloze mukucimonacami ngwafwelela katwaveceleleko milimo vanakuzata mwomwo yinavatela." Uze yise muze ngwenyi, "Kumana! Twaya tutale milimo tunakulipangila nakuzata hakumbihakumbi. Hakuhinduka nacimene tweci kuwananga haweluka hakukomba, vyakulya vyakulyaula vanatulongesela, omu natukumisa kulya malonga veci kuwakosanga. Kumana milimo kanaeyi veci kuyizatanga kuliveya?" Uze mwanamuze kuluuh, kaha nakalizu lyalindende nasonyi nawoma ngwenyi, "Mama navaYaya vmapwevo." Kahakilako mungwa hambambu, uze yise amwanukishile uze mwanenyi ngwenyi, "Tala, nge unakufuma kashikola, weci kuwananga vyakulya, ngeunali lyehi weci kuvulyamanga nakukosa malonga, nacingoloshi nawa veci kukuhikilanga, jikunyi kukucavila. Milimo kana iya eci kuyizatanga? Mwana muze whilici nge cimumu, ohoo! Ngwenyi, "Mama na vaYaya vmapwevo." Yise muze afwile miselo mumucima wenyi, amuhulishile ceka mwanenyi ngwenyi, "Mwanami walunga kawashinganyekeleko ngove Noko na vayayajove veci kuzatanga milimo yayivulu kuhambakana yetuko?" Mwana muze ngwenyi, "Haah! OveTata ngunamono unonyi ngwami milimo vali nakukilikita yayivulu cikuma, oloze nangukulomba ngwami, kuvalweza pimbi evi vyuma tunashimutwila."

Tunamono ukalu watwamo nge unakutonda kutona mangana ufume mumilima. Vathu vamwe veci kutondanga vyuma vyosena vipwenga vyakuvazacila, eci cocimwe namuthu acili mumilima. Cekanawa kuvali vathu vecikutondanga uhukuma wavakwavo utwalilileho. Kwitavila Yesu cocimwe nakulitala nakuhamuka. Yesu napu nge kumunyika camukuyoya cetu, eci kutukwatanga kumicima nakutwalumuna, cacinene hajishimbi jetu jimwe jacisemwa.

Omu shimbu tuli nakuliwahisa hakutala hacihande cakusakula vatetekeli muno mulifuci, hakupwa tuvathu vamuZambia nawa vakakwitava, tuvosena tuli nalisesa lyakulwezako vakwetu omu caya chande cakusakula. Kuhicila mukumunyika cakulishitu na kutangisa caLiuka tuvosena tunatacikiza omu fulumende yinahase kuzacila vathu mwakutamo. Tusakulenu nawa vatetekeli vaze vanahase kulihana nakutuzacila nge wangamba jetu valifuci. Katwatela kupwa ngana vakakutala Ngunja, oloze tupwenu ngana vathu vaze vali nakwasa Ngunja, vathu vakakwasa Ngunja vatacikiza cikupu omu

mwayila kuhema caNgunja keci nge likungumbuwa lyavathu wakakutalakahako. Uno mwaka twatela kupwa vathu vamwe vaze vanazale nakumunyika cakilishitu cize cineza mukaye. Shimbu kanda twingile mukusakula cavatetekeli vetu muno mulifuci twatela kulihana nakushimutwila hakumunyika eci mumauka etu amandende nakutala nawa hakutangisa caLiuka haciyulo camwaza hakutwama nakuyoya cavathu.

Mujila mukwavo tunahase kwijivila vihande vyalifuci nacyulo cakukupuka, omwe, mumaWayilesi amijimbu na mivwimbimbi, namijimbu yakusoneka mumapepa. VosenAva vakakuzata eyi milimo vatela kunangula likungumbuwa vihande vize vyavilemu vinapandama lifuci mujila yakwoloka. keci kulemenena kaha kufulumende yilinakuyulako.

Mumukanda vasonekele Vatufunga (ma Catholic Bishops) shimbukanda kusakula cahete camumwaka wa 2001. Ma Bishops vambilengwavo, *"vakakwambulula mijimbu yakulisezaseza (Media) vatela kupwa vathu vakukupuka, nakuneha vihande vyamangana yizevinahase kunangula vathu vavavulu mukuyoya cavo. Tunakulomba kupwenga kuhone kupwa cihandwa mukwambulula camijimbu cacinene mauka osena alingisa havihande vyaciyulo namilingu."*

Kunasale vyalumingo vitatu mangana twingile mulwola lwakwanuka kusanguka camwanganana vetu Yesu kulishitu. Tunakulomba ngwetu tupwenga vathu vakakwendela mukumunyika cakulishitu kuhambakana kupwa ngevathu vamumilima vanazale nawoma wakuhona kutacikiza. Tunakulombanawa kumunyika cakulishitu cimunyike muciyoyelo cavakakwitava vosenana mangana vosenavaze vanakutwama mumilima valumuke nakwiza kukumunyika eci cakatamo. Omu mukiko mwayila cilika cakanguka camwata wetu Yesu kulishitu. "Kumunyika cacimene cacalumingo cajila cineza nakuhanga milima yalikumbi lyacitanu cajila (Good Friday). Camwenemwene kumunyika cineze muno mukaye!"

Vihula Vyakushimutwila Mumaukaetu Amandende

- Mujilamuka ngunakulikafwilamo kutacikiza cihande cakusala eci nacizaho, namwaya milimo yafulumende?
- Ngunalizange kwimana hamucano cakuhona kulizakamina vyosena ovyo navitutukamo tahinyi?
- Ngunalizange kutambula Yesu kulishitu muciyoyelocami, mujilamuka ngunahase kumonesa kumunyika cakulishitu kuli vandumbwami?

Vyakuhema

Kupwenga tanga yiwana. Cisemi wapwevo navanavenyi vmapwevo vavali vapwenga vakakuzata milimo yosena hazuvo. Kaha likumbi limwe cisemi walunga mwashimwitwila namwananyi walunga omo mujila vanahase kukafwa mumilimo yahazuvo, yakufwana nge, kukosa malonga, kuhika shima, nakutelekateleka vyakulya nakukomba haweluka. Omu mwana walunga mwakumisa kushimutwila, mwaputuka nayikiye kuzatazata milimo yahazuvo nayize milimo vatela kuzata kaha mapwevo.

Vilombelo Vyavakakwitava

- Ove mwangana kalunga tunakulomba ngwetu utuhane mangana namucano tuhase kupwa vathu vakukukumunyika nakumbila ciyoyelo cecikututwalanga kumilima nakutunehela woma wakuhona kutacikiza. *Mwangana tunakulombo! Tunakulembelela wutwivwilile!*
- Mwangana tunakulomba ngwetu kumunyika cakilishitu cizenga muciyoyelo cetu mangana wututeteleleko nakutukinga mukwitava cetu. *Mwangana tunakulombo! Tunakulembelela wutwivwilile!*
- Mwangana kalunga, tunakulomba ngwetu utale hajitanga jetu nakutukisula, cacinenanyi muli yino shimbu yakeke yove. *Mangana tunakulombo! Tunakulembelela wutwivwilile!*

CALUMINGO CAMUCITANU CAKWANUKA MAKAVA AMWENE MWATA WETU YESU KULISHITU (LENT) YEAR B 02 APRIL 2006

Kutanga Catete: Yelemiya 31:31-34
Kutanga Camucivali: Wavaka Hepeleu 5:7-9
Mujimbu Wamwaza: Yowano 12:20-33

TALENU, NGULINAKUTUNGA LUSHIKO LWALUHYA

Mukutanga cetucalelo, kapolofweto Yelemiya nalifwanyisa namuthu wamatoto wakuhona kulivwashana navakwavo vathu. Kapolofweto Yelemiya vanamutumumu kuya nakwambulula mazu akalunga kuli vathu vaze vanahono kukavangiza nalufwelelo lushiko lwakalunga. Owu mulimo kana kaweshi wawashi kUzata kulimuthu vosenako. Mujimbu wakapolofwetoYelemiya wapwile wakujimbula kunyengetela na kwenyeka capwile nakwiza hakamwihi. Mujimbu wakufwana ngana, weci kunesa vathu kulizakamina kaha cacashi kuluwisa mujimbu nou alinakwaula mujimbukana.Yelemiya, omu ambulwile mujimbu, vathu vavavulu vamwalumukilile nakumuzangamisa mwakutamo, veka vamutukile, vakwavo vamuhangile, vakwawonawa vamukwacile nakumumbilila mukamenga.

Numbatuhu kwapwile kuyandayanda cakufwanangana, kapolofweto Yelemiya awanyine ngolo jakuhasa kushinganyeka nakumona kuputuka caciyoyelo cacihya eci capwile nakusemukila hashimbu yakuyandayanda. Hakupwa muthu umwe wakutalacikuma havishinganye vyakuyanda cavantu, Yelemiya, ahashile kumona ngolo jakalunga omujaputukile kwalumuna vyuma. Yelemiya afwelelele ngwenyi kalunga ecikuzatanga milimo yenyi mwaya manganaenyi. Camucanovene, eci cikiko citalililo cakuvuluka ngwavo kalunga keci kwecelela vantu jenyiko. Tunahasenawa kutala halushiko lwakalunga mujila jivali. Nge jila yimwe yakuluwa, twayenu tutale nawa jila yikwavo. Vantu vahonene kufwelela lushiko lwakalunga lwatete shikangaho kalunga kaveceleleko atuhanyine lushiko lukwavo lwaluhya ngwenyi mangana twingile muwusepa nayikiye.

Eci cinatunehelera kuwaha nakushinganyeka mwamwaza.Tunatacikiza kakavulu tweci kuhonanga kulama jishiko jakulisezaseza mukuyoyacetu. Kakavulu katweci kuhakakomangana akuhasa kusanyika kapolofweto mangana ezenga atulumbunwine mujilamuka tunahonena, yetu vavavulu kuhona cetu, cice kutuzeyesanga mumambuli pakapaka. Tunahase kuvulukako vyuma vimwe twalishikile kaha tunahono kuvilama nakuvikavangiza, lushiko lwahakutujimika, lwamalo,nolu lwamilimo yakusekashana. Hakupwa mUkalu kanaowu twatela kwivwa mazu akufwana nge, "*Talenu ngulinakumitungila lushiko lwaluhya.*" Kulumbununa mazukanAwa, kalunga alinakuputuka ciyoyelo calushiko lwaluhya, vetu tuvosenana vanatusanyika kupwa vathu valushikOlukana. Camwenemwene kalunga alinakutusanyika mangana twingile mUsepa hamwe nayikiye nakuputuka ciyoyelo cacihya. Vakwetu vaBemba vata cishimo ngwavo, "*Apateveta lesa, tapafuka cushi.*" Eci cinayila mujila yakwamba ngwavo, mawana akalunga atwama awana wakanyongo. Shikangaho cinapu cacinene kulivetu vakakwitava kukumbulula kumutambi wakalunga.

Tuvosenana tunetavila ngwetu lufuci lyetu lyaZambia lili nakutalaceka hajishimbi jalifuci cikokicikoki mangana vahase kuwana jishimbi jimwejilili jinahase kushimbula. Tuvosenana tunafwelela nawa ngwetu mukusakula cava tetekeli nacizaho, natupwa nakusakula kuhicila mujishimbi jajihya. Eji nawa tunafwelela ngwetu jinahase kutwimanyinako mangana tusakule mujila yakwesekesa namukUnda. Tunafwelela nawangwetu yetu tuvosenana tunatacikiza lusesa namilimo twatela kuzata hakupwa vathu valifuci, kuhambakana omutwapwile mummyaka yitanu yinahici yamunyima. Lelolino tulinalusesa lwakuhasa kuhanga vatetekeli vamokomoko, nge katwawahilileko nacyulocavo. Eci cinapu cumacimwe cacihya, kahanawa camwaza, nge kamweci nakumona eci kuyemako, mwatela kuhulishisa. VaLuvale ngwavo, "*kwatoku namukwenu ukawove mulyataho.*"

Talenu, ngetuli nakutonda kuyoya cacihya twatela kukumbulula lweseko luno. Olu lweseko kana vanalwambulula mumujimbu wamwaza. *"Kuvangila mbuto yiholokele hamavu amwaza nakufwa nge nayitondeka kusoka, oloze nge pimbi mbuto kana kayeci kusokako, oloze ngembuto nayivangila kufwa, nayisoka naunyoji nahakwangwilila nahapwa hahanene."* Ciyoyelo caukalunga catondeka vathu vakulihana nakukufwa. Nangumilweza ngwami twatela kufwa kukulivwimba, kuvilota vyakutonda kupita kuhicila mukulila likungumbuwa lyavathu hamitwe. Inyi mauka atala hamilingu nacidulo, mujilamuka vanahase kufwilamo? Vatela kulinunga hamwe mangana vahase kuzacila vakalifuci. Vatela kumbila jishipilitu jakulitonda nakweseka kutala haciyoyelo cavathu kuvula. Mujila tunahase kupwa najishimbi jakusakula kuli vathu vavavulu, kuvangilavene vathu valihana nakumbila nakufwila lifuci, eyi yikiko jila yimwe yinahase kuneha kuyoyacacihya mulifuci lyetu lyosena.

Kulinyengetela cavathu cinahase kukuma nge vathu navasolola kupwa namicima yakuzacila lifuci shimbukanda vashinganyeke kulizacilavavene. Mauka akalunga atatu amanene munomulifuci, akufwana nge, vaka Evangelical Fellowship in Zambia (EFZ), Zambia Episcopal Conference (ZEC) navaka Council of Churches in Zambia (CCZ) mumukanda wavo vasonekele shimbukanda kusakula caciyulo calikungumbuwa mumwaka wa 1991. vasonekele ngwavo, *"Kusakula cavakakututwaminyinako catela kupwa camwaza kumeso avathu vavavulu, eci cikiko kuzanga cavathu mulifuci lyosena. Cipwe tuli nakufuma kumauka akulisezaseza, oloze tulivathu vamwe valifuci limwe."*

Mucalumingo cino camucitanu mungonde yino yakeke yakalunga tulombenu nakusakwilila kalunga hakutuhana vitalililo vyavivulu mumauka etu nakutulweza ngwenyi, twatela kutalilila kuciyoyelo eci cili nakupuka cacihya. Tunakulombanawa ngwetu omunatuya nakusakula vatetekeli vetu vamufulumende tuhase kulinunga umwe nakuzacila lifuci mwakutamo. Tunakulomba cekanawa ngwetu mungonde yino yakutala hamakava amwene mwata wetu Yesu kilishitu, tuhase kuwana lwola lwakwiza nakufukama mambuli kukulusu yenyi yajila. Mangana Yesu kulishitu yikiyekaha nahase kutulongesa mujila yakulihanyinamo mwakutamo. Yikiye ambile ngwenyi kuyoya cakutamo catwamakaha mukuhicila mukilihana. Shikangaho kalunga alinakutusanyika mangana tulikwate usepa nayiye kuhicila mulushimbi lwaluhya.

Vihula Vyakushimutwila Nakushinganyeka Mumauka Amandende

- Ngunalame ngacilihi lushiko lwami lwaKujimika, lwaWulo, lwaUpilishitu numba milimo yeka yakalunga?
- Ngunalihane nakulizanga kwingila mUsepa nakalunga tahi?
- Tunalizange kuzacila hamwe navakwetu vakufuma kumauka akulisezaseza tahi?

Vyakuhema

Kupwenga pwevo nalunga. Vanashimbula muwulo. Umwe mwahokola lushiko valishikile. Owu mukwavo mwamukonekela. Kaha navaputuka ceka kutwama cacihya. Vosena navawahilila haciseke cinakinduluka muze mutanga.

Kulombelela Cavakakwitava

- Ove kalunga tata tulinakukusakwilila hakuvula cavinjiziko vyove, evivili nakutulweza ngwavo camucanovene kuyoya cacihya cilanakuputuka. Mwangana tunakulombo *Tunakulembelela wutwivwilile*
- Mwangana kalunga tunakulomba kulinunga caumwe namukwavo cacinene muli uno mwaka wakusakula vatetekeli, tuhaneko mangana akuhasa kasakula vatetekeli navatwala lifuciyetu kulutwe. *Mwangana tunakulombo!* Tunakulombelela wutwivwilile
- Mwangana kalunga wahasa vyosena omu tuli nakulizangazanga nakuvandamina cilika cakanguka camwanove Yesu kulishitu tuhane mangana akutacikiza ciyoyelo cakutamo cize cinahasekaha kufuma mukuhicila mukulihana mukufwa cakulisezaseza. Mwangana tunakulombo! *Tunakulembelela wutwivwilile*